

14 AUG 2000

LEE KUAN YEW TIBA DI TAMBAK JOHOR UNTUK MULAKAN LAWATAN KERJA

JOHOR BAHRU, 14 Ogos (Bernama) -- Menteri Kanan Singapura Lee Kuan Yew tiba di Tambak Johor di sini hari ini untuk berkereta menuju ke Kuala Lumpur bagi memulakan lawatan kerja empat hari ke Malaysia.

Lee bersama rombongannya tiba di Tambak Johor pukul 1 tengah hari dan terus menuju ke Lebuhraya Utara-Selatan.

Jarak perjalanan dari sini ke Kuala Lumpur melalui Lebuhraya Utara-Selatan ialah 313.5km dan mengambil masa kira-kira tiga jam.

Ini adalah lawatan kerja pertama bagi Lee sejak melepaskan jawatan Perdana Menteri Singapura pada 1990. Lee telah menjadi Perdana Menteri republik itu selama 31 tahun.

Semasa di Kuala Lumpur, Lee dijadual melakukan kunjungan hormat ke atas Perdana Menteri Datuk Seri Dr Mahathir Mohamed dan Timbalan Perdana Menteri Datuk Seri Abdullah Ahmad Badawi.

Lee, yang diiringi isterinya, Kwa Geok Choo serta 10 pegawai, akan turut melawat Menara Kembar Petronas, Lapangan Terbang Antarabangsa KL (KLIA) di Sepang dan pusat pentadbiran kerajaan persekutuan, Putrajaya.

Selain bagi meninjau perkembangan dan pembangunan pesat Malaysia sepanjang tempoh 10 tahun lepas, lawatan kerja itu juga bertujuan mempertingkatkan lagi hubungan dua hala antara Malaysia dan Singapura.

-- BERNAMA

MKO NMO